

che den Unterschied in der Arbeit finden / vnd meine Invention der andern vohrziehen vnd gebrauchen wollen. Ist mehrentheils vmb der armen Laboranten / Weinbrenner vnd Haushalter willen geschrieben / welche offtermahl gern etwas laboriren / distilliren / vnd brawen oder kochen wolten / vnd solches wegen Mangel der Kessel abzustellen gezwungen werden. Denen viel leichter drey oder vier Pfundt Kupffer zubezahlen seyn / als 60. 80. oder 100. vnd auch leichter ein hölzern Faß lassen machen / als einen Ofen bawen / da mancher offt wenig Raum zu hat / wolte er schon die Kosten daran legen / mag derhalben ein jeder das beste daß ihm anstehet heraus lesen vnd folgen. Das ich allhier beschreibe vnd lehre / ist mehr den Armen als Reichen zu gefallen geschehen; doch wolle sich kein reicher Laborant schämen / ob er schon Raum genug in seinem Laboratorio hat / vnd die Kosten an kupfferne Kessel zu wenden nicht scheuen darff / diesem Weg zu folgen / dann jedermann frey steht / zu seinem Vorhaben den kürzten Wege zu suchen / es were dann / daß mancher lieber auff gebahntem Wege wolte weit umbgehen / als durch einen ungebahnten leichtlicher zu seinem Fürhaben gelangen. Der also gesinnet ist / kan hierinn keine Hülf finden. Ich für mein Person contentire mich darinn / daß ich vermeynet / daß es meinem Nächsten zum guten offenbahret / es sey nun wol oder vbel angelegt / so ist es gleichwol auß gutem Herzen vnd Meynung geschehen / vnd bin versichert / daß mehr